

Gij Hong Vahcuengh Sawcuengh Suijbingz Gaujsi Bi 2020 Saedyienh “Seiq Onj”

2020 年度壮语文水平考试工作实现“四稳”

□ Cinz Yenyen/覃燕艳

Vahcuengh Sawcuengh Suijbingz Gaujsi bi 2020 youq bi'gvaq 10 nyied 31 hauh youq Cunghgung Nanzningz Siveij Dangjyau swnhleih hai gauj. Seizneix, gij hong cujciz hengzguh gaujsi, gajgienj, cazcam cingzcik, guhfat gaujsi hozgwz cwnghsuh, gyoepsuenq gij soq gaujsi daengj, gaenq cienzbouh guh liux lo, gij hong Vahcuengh Sawcuengh Suijbingz Gaujsi bi'gvaq saedyienh “seiq onj”.

It. Giengzvaq gaujsi cujciz lingjdauj, “onj” gaujsi cujciz gihgou

Swcigih Minzcunghvej gig yawj-naek nienzdoh Vahcuengh Sawcuengh Suijbingz Gaujsi, it dwg laebhwnj laebcaez aen gihgou lingjdauj cujciz gaujsi, laebbaenz nienzdoh Vahcuengh Sawcuengh Suijbingz Gaujsi gunghcoz lingjdauj siujcuj caeuq nienzdoh gaujsi gaujuv gunghcoz lingjdauj siujcuj, Swcigih Minzcunghvej anbaiz boux vej lingjdauj faenguenj gij hong gaujsi haenx guh cujjang, boux ngeih gaep sinzsiyenz bangbouj faenguenj gij hong gaujsi haenx guh fucujjang, bouxdaeuz cujyau vej minzcuz yijvwnz cu guh cungjhezdiuz, Gvangjsih Minzcuz Yijvwnz Yenzgiu Cunghsinh, Cunghgung Nanzningz Siveij Dangjyau, Nanzningz daengj sibseiq aen si Minzcunghvej bouxdaeuz roxnaeuz bouxdaeuz faenguenj gij hong minzcuz yijvwnz haenx guh siujcuj cwnghzyenz. Ngeih dwg bouxdaeuz Swcigih Minzcunghvej gig yawjnaek gij hong gaujsi, liz ngoenz gaujsi lij miz caet ngoenz seiz, boux vej lingjdauj faenguenj gij hong haenx couh guhdaeuz ciuhai aen hoih gaujsi gunghcoz lingjdauj siujcuj, cazyawj gaujsi bwh ndaej yienghlawz, anbaiz gaujuv gunghcoz, lij youq ngoenz gaujsi byaijyawj gak aen gaujjangz, genjcaz, sonyinx gij hong gaujsi gaujuv; Sam dwg gaujsi gihci caezcienz, yiemzgek ciuq 《Gij Sonyinx Fuengzhaed Binghrao Bwtndat Gak Cungj Yienhciegz Bizsi Mensi》, yenzgiu dingh'ok 《Aen Fueng'anq Hengzguh Vahcuengh Sawcuengh Suijbingz



Gaujsi Bi 2020》《Aen Fueng'anq Gaujuv Vahcuengh Sawcuengh Suijbingz Gaujsi Bi 2020》, mingzbeq doekdingh gij hong caeuq iugouz senhconz fatdoengh, bauqmingz, ok daezmoeg, baujguenj baujmiz sigienj, gaujuv beizyin, cinjgaujcwngh guh fat, gaujjangz anbaiz, cunzyawj caeuq genhgauj, ancienz baujhen, fuengzhaed binghrao daengj, lij laebbaenz le gaujuvcuj, cunzyawjcuj, genhduzcuj, baujmizcuj, genhgaujcuj, hongsaeh ywbingh cuj, baujhencuj, hougincuj daengj.

Ngeih. Gyagiengz gij hong senhconz fatdoengh gaujsi, “onj” gyoengq bouxbauqgauj

Vih hawj vunzlai vunz rox aen gaujsi neix, nyienh daeuj camgya gaujsi, Swcigih Minzcunghvej cawzliux yaenqfat nienzdoh gaujsi hengzguh fueng'anq hawj cibseiq aen si Minzcunghvej(giz), iugouz gyoengqde guh ndei gij hong gaujsi senhconz fatdoengh, lij youq 《Gvangjsih Yizbau》《Nanzgoz Caujbau》《Gvangjsih Minzcuz Bau》caeuq Minzcunghvej Vangj, Gvangjsih Minzcuz Bau Vangj, Gvangjsih Minzcuz Daihhag, Nanzningz Swhfah Daihhag, Gvangjsih Minzcuz Swhfah Yozyen daengj gauhyau doenghgij veihsinginz lauxsae

caeuq hagseng haenx, fatbouh gaujsi gunghgau, dazyinx vunzlai giethab saedsaeh daeuj camgya gaujsi. Gingvraq dauqcawq senhconz fatdoengh, gungh miz 299 vunz bauqmingz camgya gaujsi, gyoengqde daj Nanzningz, Fangzcwnghgangj, Ginhcouh, Gveigangj, Baksak, Bwzhaij, Hozciz, Laizbinh, Cungzcoj daengj 9 aen si daeuj, hawj gij soq baugauj caeuq gij soq bingzyaenz hai gauj 9 bi daeuj ca mbouj lai doxdaengh. Gaujsi sat le, Swcigih Minzcunghvej lij gibseiz dawz sigienj caeuq canhgauj dapanq hawj Gvangjsih Minzcuz Bau fatbouh, hawj vunzlai hagsib.

Sam. Gveihfan okdaez, “onj” caetliengh daezmoeg gaujsi

Geij bi gonq, gaenq haenqrengz gohyoz ok daezmoeg, bineix, Swcigih Minzcunghvej laebdaeb cingj gyoengq gyauyuz cwzbingz conghyah daeuj sonyinx gij hong gaujsi, cawzliux faensik gij caetliengh sigienj, cingzcik hagseng, dwzcwngh hagseng cogaep, cunggaep, gaugaep Vahcuengh Sawcuengh Suijbingz Gaujsi Bi 2019 haenx, lij riengz gyoengq conghyah Vahcuengh Sawcuengh caez haeujbae okdaez, gyoengqde gaengawq bigonq gaujsi faensik gezgoj, diuzcingj le okdaez fuengyiengq. Gaujsi sat le, daj

gij gienjmienh gezgoj daeuj yawj, bi'gvaq gaujsi ndaej laebdaeb baujciz gohyoz okdaez, daezmoeg nanzheih habngamj, gij faen bingzyaenz cogaep, cunggaep, gaugaep faenbied dwg 59.29、64.76、65; habgeklwd faenbied dwg 61.64%、66%、57.14%, song yiengh cungj dwg ceiq sang hai gauj 9 bi daeuj. Caiqlix, gaujsi sat le, gaujswngh caeuq boux conghyah gajgienj caemh naeuz daezmoeg bineix ndaej gaenriengz gaujsi dagangh, loihhingz daezmoeg caeuq gij cih-sizdenj gauj haenx cungj cienzmienh, miz cimdoi, daezmoeg yiengh lai, ndaej genjniemh gij suiibingz Vahcuengh Sawcuengh boux daeuj gauj.

Seiq. Yiemzgek gaujsi liuzcwnghz, “onj” gaujuv gunghcoz

Daj bineix ndwen 9 daeuj, Swcigih Minzcunghvej caeuq Cunghgung Nanzningz Siveij Dangjyau daengj bumwnz danhvei, yunghsim bae bwh, maenhsaed doicaenh gak hangh gaujuv gunghcoz. Moix aen gaujuv gunghcozcuj cungj ndaej yiemzgek ciuq yinzsw gij mizgven gvidingh gaujsi, daezgonq bwh ndei sojmiz hong gaujsi, gij hong okdaez, baizbanj yaenqdaez daengj cungj saedhengz ngeihcib seiq aen cungdaeuz cienz fungsak guenjieix. 10 nyied 31 hauh, Vahcuengh Sawcuengh Suijbingz Gaujsi Bi 2020 ciuqseiz youq Cunghgung Nanzningz Siveij Dangjyau gawjhengz. Baenz aen gaujsi mbouj luenh saekdi, ndaw gaujjangz hix guenjieix ndaej ndei. Gyoengq vunz gaujuv dawzseiz yunghsim guhhong, yiemzgek guenjieix, baenz daengx aen gaujsi mbouj miz gaujswng guh gyaj, cau roxnaeuz caeg yawj dapanq vunzwnq. Gaujsi sat le, gaj gienj, gyoepsuenq gij soq gaujsi, fatbouh cingzcik daengj hong sikhaek ciuq dajveh bae guh. Seizneix, gij hong yaenqguh, faenfat cingzcik baugaudanh caeuq habgek cwnghsuh gaujswngh, faensik cingzcik daengj hix cungj guh liux lo. Gij hong Vahcuengh Sawcuengh Suijbingz Gaujsi bi 2020 guh baenz guh ndei lo.